

Es isch Samschtig abe, d Wuche n isch verby  
Und mir hocke n ir Beiz und suufen es Bier  
Der Blick lygt vor mer, es isch e Gruus  
Was die wider brichte u eis zämedichte  
Mir diskutierte grad ob's no geit, was die Herre z Bärn vo üs alles no wei  
Lyre übere Bänzinprys, ob´s so wyter geit?  
Flueche chly über d Schtüüre, u jede seit  
sy Meinig, so wie's steit ir Bundesverfassig, eh ja, Meinigsfreiheit  
Da nimmt eine d Charte füre u meint:  
"Chumm mir spylen eis", u schnäll het är verteilt  
Aber da muess i passe, wüll i ha ke Blasse vom Jasse  
I bi du ane andere Tisch ga hocke  
U si hei e flotte Dreier afa bocke  
I ha nid wölle schtöre u ha o ds Gylr nümm möge ghöre  
I hocke mi also zu däm Meitschi dert  
Wo o nid het möge alleinzi sy  
U mir schwätze über Dis und Das,  
U so lääre mir no n es paar Glas,  
Bis der Beizer rüeft: "Itz isch Schluss  
I fuf Minute, syt dir aui duss"  
Später de, daheim bi r Veronika  
Git si mir nüün Charte n i d Hang, aber  
da muess ig passe, wül, i ha ke Blasse  
I mache doch fasch alles mit, aber da,  
da muess i passe wül, i ha ke Blasse vom Jasse  
Ob Näll oder Puur oder Otto Stich  
Ob unde ufe, oder oben abe  
I ha ke Blasse, ob Rot, ob Schwarz  
Ob Dame, König oder Ass, i verstah überhoupt nüt vo Jass  
Ob Nüüner, 13er, ob 7/8, i säge nume  
"Kiss my ass!" I verstah total nüt vom Jäzz  
Es git serig, wo bhauptete, dass du ke rächte Schwyzer bisch  
Nume wüll du nid düregsehsch a ihrem Stammtisch  
Wo sälber aber gar ke blasse Schimmer hei  
Vo der ganze Schweinerei  
Wo uusgasset wird Tag u Nacht  
Uf em Spyltisch vo der Macht  
Wo gschtoche wird u geschobe  
Während mir brav göh ga maloche  
Wo Chilche, Politik und Marktwirtschaft  
Hand in Hand uf Profit hi schafft, wo di kene fragt, wie und warum  
und d Puure jasse und luege dumm  
Da müesse si passe, wül si hei ke Blasse  
Aber da müesse si passe, wül si hei ke Blasse vom Jasse  
Solang si schwyge, mache si mit, aber bi däm Spiel, da müesse si passe  
wöu, si hei ke Blasse vom Jasse... Ir Beiz hocke u jasse  
aber vom Jasse hei si ke Blasse  
bi däm Spiu, da müesse si passe  
ruehig sy u schön ufasse  
Vom grosse Spiu hei si ke Blasse wül  
was da würklech abgeit, da hei o mir - ke Blasse